

agama

u/malaysia
8/1/15 m/s 4

UMAT Islam seharusnya meneliti terlebih dahulu fatwa yang dikeluarkan oleh Majlis Fatwa Kebangsaan sebelum membeli produk yang ada kaitan dengan alkohol.

- GAMBAR HIASAN



Fatwa tentang alkohol, arak

Dapat tentukan status halal atau haram



MAJLIS Fatwa Kebangsaan telah mengeluarkan beberapa fatwa berhubung status alkohol dan arak bagi mengelakkan kekeliruan dalam kalangan umat Islam.

Perbincangan tersebut bukan hanya merangkumi pandangan Islam terhadap alkohol dan arak tetapi turut menyentuh soal-soal penggunaan dua bahan itu dalam makanan, pewangi dan ubatan.

Fatwa yang turut mendapat pandangan daripada pakar-pakar itu mampu memberi panduan kepada umat Islam dalam menentukan status halal atau haram sesuatu bahan yang menggunakan sebatian alkohol (etanol).

Muzakarah Jawatankuasa Fatwa Majlis Kebangsaan Bagi Hal Ehwal Ugama Islam Malaysia Kali Ke-7 yang bersidang pada 11 - 12 April 1984 telah memutuskan bahawa:

PEWANGI yang ada kandungan alkohol adalah harus. - GAMBAR HIASAN



1 Setiap minuman arak mengandungi alkohol. Bukan semua alkohol itu mengandungi arak. Alkohol dari proses pembuatan arak hukumnya haram dan najis, tetapi alkohol yang dibuat bukan melalui proses pembuatan arak hukumnya tidak najis tetapi haram diminum.

2 Minuman ringan yang dibuat sama caranya dengan membuat arak sama ada mengandungi sedikit alkohol atau alkoholnya disuling adalah haram diminum.

3 Minuman ringan yang dibuat bukan untuk dijadikan arak atau bahan yang mabuk dan tidak sama caranya dengan proses arak adalah halal.

4 Tapai halal dimakan.

5 Alkohol yang terjadi sampingan dalam proses pembuatan makanan tidak najis dan boleh dimakan.

6 Ubat-ubatan dan pewangi yang ada kandungan alkohol adalah harus dan dimaafkan.

ALKOHOL SEBAGAI PENSTABIL MINUMAN RINGAN.

Muzakarah Jawatankuasa Fatwa Majlis Kebangsaan Bagi Hal Ehwal Ugama Islam

Malaysia Kali Ke-22 yang bersidang pada 24 November 1988 telah membincangkan Alkohol Sebagai Penstabil Minuman Ringan.

Muzakarah telah memutuskan bahawa kordial yang mengandungi bahan perisa yang dimasukkan alkohol untuk tujuan penstabilan adalah harus (boleh) digunakan untuk tujuan minuman sekiranya:

1 Alkohol itu bukan dihasilkan dari proses pembuatan arak.

2 Bahawa kuantiti alkohol dalam perisa (flavour) itu adalah sedikit iaitu tidak memabukkan.

ALKOHOL DALAM MAKANAN, MINUMAN, PEWANGI DAN UBAT-UBATAN.

Berdasarkan taklimat, pembentangan dan penjelasan yang disampaikan oleh pakar-pakar daripada Institut Penyelidikan Produk Halal, Universiti Putra Malaysia serta dengan mengambil kira keputusan-keputusan yang telah diputuskan dalam Muzakarah Jawatankuasa Fatwa Majlis Kebangsaan Bagi Hal Ehwal Ugama Islam Malaysia terdahulu, Muzakarah Khas Jawatankuasa Fatwa Majlis Kebangsaan Bagi Hal Ehwal Ugama Islam Malaysia yang membincangkan isu alkohol dalam makanan, minuman, pewangi dan ubat-ubatan pada 14 hingga 16 Julai 2011 telah bersetuju memutuskan seperti berikut:

1 Setiap minuman arak adalah mengandungi alkohol. Walau bagaimanapun bukan semua alkohol itu adalah arak. Alkohol yang diperolehi daripada proses pembuatan arak, hukumnya haram dan najis.

2 Manakala alkohol yang diperolehi bukan melalui proses pembuatan

UBAT atau suplemen turut mengandungi alkohol yang dibenarkan oleh Islam. - GAMBAR HIASAN

arak hukumnya tidak najis, tetapi haram (tidak boleh) diminum dalam bentuk aslinya kerana ia adalah racun dan boleh membunuh.

3 Minuman ringan yang diproses/dibuat bukan dengan tujuan untuk menghasilkan arak dan mempunyai alkohol di bawah aras satu peratus adalah harus (boleh) diminum.

4 Manakala minuman ringan yang dibuat dengan niat dan cara yang sama seperti proses membuat arak, sama ada mengandungi banyak atau sedikit alkohol atau alkoholnya disuling adalah haram diminum.

5 Makanan atau minuman yang mengandungi alkohol secara semula jadi seperti buah-buahan, kacang atau bijirin serta perahannya, atau alkohol yang terkandung itu terjadi secara sampingan semasa proses pembuatan makanan atau minuman adalah tidak najis dan harus (boleh) dimakan/diminum.

6 Makanan atau minuman yang mengandungi bahan perisa atau pewarna yang mengandungi alkohol untuk tujuan penstabilan adalah harus (boleh) digunakan sekiranya alkohol itu bukan dihasilkan dari proses pembuatan arak dan kuantiti alkohol dalam produk akhir itu adalah tidak memabukkan dan kadar alkohol tidak melebihi 0.5 peratus.

7 Ubat-ubatan dan pewangi yang mengandungi alkohol sebagai bahan pelarut adalah tidak najis dan diharuskan sekiranya alkohol tersebut bukan diambil melalui proses pembuatan arak.

(Sumber: Portal Rasmi Fatwa Malaysia).